



Escritor Quito Nicolaas cu les exitoso na St. Maarten



ORANJESTAD(AAN)— E autor y poeta Arubiano Quito Nicolaas a duna les interactivo na muchanan di scol basico di Leonard Connor Primary School na St. Maarten.

Nicolaas a combersa cu muchanan di klas 5 y 6 encuanto su experiencia cu skirbi buki y e balor di lesa buki for di chiquito. E les tabata interactivo pa cual pa medio di asociacion di palabra e muchanan mes a skirbi un poema cortico. Despues algun cu hopi entusiasmo a recita nan poema. Interes pa e autor no tabata hasi falta. E muchanan a hasi pregunta di for di ki tempo el a cuminsa skirbi te cu ki buki e ta skirbiendo actualmente. Pa finalisa el a hasi entrega di un di su obranan na un di e alumnonan.

E encuentro cu autornan ta parti di e festival literario di St. Martin Book Fair cu kier pone enfasis riba e importancia di lesa y

promove lesamento tor di edad jong.

Pa sigui promove lesamente bou di adulto Nicolaas a duna su charla How to identify Aruban literature today na Universidad di St. Maarten. Hopi atencion a ser duna den prensa na St. Maarten y den Caribe na e charla aki cual tabata hopi interesante.

Quito Nicolaas ta conoci pa diferente tomo di poesia, manera Destino, Gerede twijfels, Atardi di Antaño y su ultimo obra Alameda. E ta gran promotor di uso di Papiamento como lenga. Na 2004 su prome obra na Papiamento riba tereno di prosa Tera di silencio a ser publica. Cu su charlanan na Hulanda y na otro parti di Caribe e ta duna atencion amplio na literatura Arubiano y ta stimula vision y skirbimento na Aruba y Hulanda. Actualmente e ta trahando riba un obra na Hulandes cu lo sali otro año.

Por sigui'e durante e festival riba e blog Gedachten in Gedichten.